

Najugaq qimannagu isumaginninnermi siunnersortitut ilinniarfimmik ilersitseqqullugit Naalakkersuisut peqquneqarnissaannik Inatsisartut aaliangiiffigisassaattut siunnersuut.
(Inatsisartuni ilaasortaq Peter Olsen, Inuit Ataqatigiit)

Akissuteqaat

(Meeqqanut, Inuusuttunut, Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

Siullermeerinnineq

Inatsisartunut ilaasortaq, Peter Olsen, Inuit Ataqatigiit siunnersuuteqarneranut Naalakkersuisut qutsavigaat.

Isumaginninnermi siunnersortinik amigaateqarnerujussuup kingunerisaanik innuttaasunik pitsaanginnerusumik sullissisoqartarneranik kinguneqartarneranillu siunnersuuteqartup saqqummiussaqaqnera Naalakkersuisut isumaqatigaat. Ilinniakkamut amerlanerusut qinnuteqartarnissaat, maannakkullu unammilligassanik aaqqiiniarnermi taamaalillutik tapersiuteqartarnissaat, kissaatiginartuuvoq.

Ilinniarnertuunngorniarfimmi ilinniagaqarsimanissaq ilinniagaqalernissamut piunasaqaataavoq.

Ukioqatigiit ikiliartormata ilinniarnertuunngortartut killeqarput. Akerlianilli ilinniakkanik amerlasuunik toqqagassaqaqluarput. Ilinniagaqarniarlutik qinnuteqartunut ilinniakkamut aalajangersimasumut naalakkiteqarnissaq ajornarlunilu kissaatiginanngilaq. Ilinniakkamut ilinniariaatsinik amerlanerusunik neqerooruteqarnikkut isumaginninnermi siunnersortitut ilinniagaqarsimasut annertuumik amerleriarnissaannik kinguneqarsinnaanissaa taamaattumik nalunarpaq.

Isumaginninnermi siunnersortitut ilinniartitaaneq Iisimatusarfimmit maannakkut neqeroorutigineqartarpoq. Taamaattumik ilinniakkamut piginnaaneqassuseq Iisimatusarfimmiippoq tassanilu najugaq qimannagu ilinniartitaaneq aallartinneqarsinnaalluni.

Perorsaanermik Ilinniarfiup Ilulissaniittup Siunnersuinnermi Ikiortitut Ilinniagaq aamma Ilinniagartuutut Ilinniagaq Isumaginninnerup Iluani Siunnersorti neqeroorutigisarpai, taakkulu tunngavigalugit immikkut akuersissuteqarnikkut angusanillu aaqqiissuteqarnikkut Iisimatusarfimmi isumaginninnermi siunnersortitut qitiusumik ilinniakkamut qinnuteqarsinnaanngornissaq aamma periarfissaavoq. Ulumikkut isumaginninnermi siunnersortitut ilinniagaq sisamat taamatut naammassisimavaat. Ilinniagartuutut Ilinniagaq Isumaginninnerup Iluani Siunnersortitut ilinniagaqarsimasunut piginnaanngorsaqqiinerit ilanngunneqarnissaat aamma isumaliutigineqarsinnaapput.

2015-imit 2018-imut Iisimatusarfiup avataani najugaq qimannagu modulit arlallit Ilinniagartuutut Ilinniagaq Isumaginninnerup Iluani Siunnersortitut ilinniakkamik kinguneqartut ingerlanneqartarsimapput. Tassani ilinniagaqarsimasut kingornatigut isumaginninnermi siunnersortitut ilinniakkamut qinnuteqarsinnaasimapput ukiullu aappaata

affaanik sivilissuseqartumik isumaginninnermi siunnersortitut ilinniakkamik naammassisaqarsinnaasimallutik.

Najugaq qimannagu isumaginninnermi siunnersortitut ilinniartitaanerup ilinniaqatigiinnik ikittuinnarnik kinguneqarsinnaanera ersissutigineqarsinnaavoq, taamatullu isumaginninnermi siunnersortinik amigaateqarnerup unammisassaqaqarnerata aqqinniarnernut annertuumik sunniuteqanngitsoorsinnaalluni. Taamaattumik ilinniartitaanerup tamarmiusup ilinniartuusinnaasullu kiisalu pisortani atorfeqartunut piginnaanngorsaaqqiinerit isiginiarneqarnissaat pingaaruteqarput. Attassinissamut Siuariartornissamullu Pilersaarut 2-mi, aqqissuusseqqinnermi siunnerfik 1, Ilinniartitaanerup piginnaasallu qaffasinnerat, suliarineqarnerani tamanna pisinnaasoq Naalakkersuisut naleqqussorivaat.

Tamanna tunngavigalugu allannguutissatut siunnersuummik imaattumik Naalakkersuisut saqqummiussipput:

“Najugaq qimannagu isumaginninnermi siunnersortitut ilinniarisimik, pisariaqartitat aallaavigalugit misissuinissamik Attassinissamut Siuariartornissamullu Pilersaarut 2-mi, aqqissuusseqqinnermi siunnerfik 1, Ilinniartitaanerup piginnaasallu qaffasinnerat suliarineqarnerani pissaq Naalakkersuisut peqquneqarnissaannik Inatsisartut aalajangiiffigisassaattut siunnersuut.”